

Namba 33 Trinde, Desemba 1, 1971 Prais 10¢.

YU MAS SAVE  
LONG

# *As Tingting Bilong ol Politikal Pati*

YU KEN PAINIM LONG  
DISPELA NIUSPEPA TASOL



"O TUMBUNA, MI GAT BIKPELA WARI. SAPOS MI LUSIM ILEKSEN, BAI MI MEKIM WANEM SAMTING?"

"PIKININI, YU NO KEN WARI. YU KAM BEK LONG PLES NA HELPIM MIPELA LONG WOK."

# PAS I KAM LONG EDITA

Sapos yu gat tok yu raitim sotpela tasol. Sapos yu raitim longpela bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela prinim nem bilong yu tru, orait yu raitim arapela nem bilong yu tu.

## Mani i No Buk

Dia Edita.- Nau mi laik bekim askim bilong dispela man nem bilong em Joe H. Undaudrey em i tok mani em i no buk na yu raitim nem bilong yu long en.

Planti mammeri ol i save raitim nem bilong ol long mani na mi save lukim tu em i no stret. Mani ol i givim yu em bilong baim dres bilong yu.

Em i no bilong ritim nem bilong yu. Na man bilong yu em i givim yu mani, em bilong baim dres bilong yu. Em tasol liklik bekim bilong mi.

J. Joe P. Basse  
Manam Ailan

## Abusim ol Pasin

Dia Edita.- Mi laik bekim pas bilong Mista Abdul Daure bilong Bulolo.

Yes brata Abdul, long pas bilong yu bin point-imaut tupela samting bilong baim meri.

(1) Meri i liklik yet na papamama i hatwok long lukautim em. Olsem na baim meri em i gutpela.

(2) Em pasin bilong tumbuna olsem na yumi mas holim. I no ken lusim.

Long namba tu point bilong yu em i stret tasol pasin bilong tumbuna i bin senis pinis long-taim. Mi bin harim olsem ol tumbuna bilong yumi i no save baim meri long katen bia na bek rais na bulmakau na ol liklik samting ya yumi save kolim mani. Ol i save baim meri long tit bilong dok na pik na kina bilong solwara ya. Taim

pikinini meri bilong ol i laik marit ol i no save pulim planti samting tru olsem nau. Nau long dispela taim em i narakain olgeta. Prais bilong baim meri em i go antap moa moa yet. Sapos yu laik holimpas samting long tumbuna stret. I no miks wantaim samting bilong tude.

Vallians Agua  
Madang.

## Wokabaut Olsem Hipi

Dia Edita.- Mi laik autim liklik toktok long tingting bilong mi long sotpela sket. Mi save harim long redio na ritim long ol kain kain niuspepa na ol sampela arapela buk nabaut long sotpela sket.

Planti man na meri i laikim, na planti man na meri i no laikim. Na mi em mi wanpela long ol dispela mammeri i no laikim sotpela sket. Mi laik askim olgeta man na meri ol i save laikim mini sket. Bilong wanem yupela i save laikim sotpela sket? Wanem kain tingting i save kamap long yu taim yu putim sotpela sket o lukim sotpela sket?

Sapos ol pren hia ol i save laikim sotpela sket yupela i lukluk i go bek long bipo tru long taim no gat faktori bilong wokim laplap. Ol tumbuna bilong yumi ol i stap nating, no gat laplap. Sampela i pasim nating hap skin diwai o gras sket. Orait mobeta yu pasim nating wanpela hap laplap olsem ol tumbuna bilong yumi o sapos no gat i hatwok, yu rausim olgeta laplap na yu wok-abaut olsem hipi.

Mi bin lukim planti

yangpela man sapos taim ai bilong ol i pas long sotpela sket, ol i no inap rausim ai bilong ol hariap. Na tu ol i save long wanpela hap ples bilong salim ol samting i gat sotpela sket, na ol i go, i no bilong baim ol samting long mani no gat bilong ai tasol.

Sapos yu meri bilong laikim sotpela sket, long soim ol man i hapim sket bilong yu, yu no ken singaut long wanem yu laikim ya. Em tasol, sapos husat man i laik bekim hap tok bilong mi bai mi hepi long ritim long Wantok.

Johnnie Paul Rever  
Manus Ailan

## Meri Long Rum Draiva

Dia Edita.- Nem bilong mi Gabriel Kuta. Na mi laik tok save long ol haiwe draiva. Mi lukim planti taim ol haiwe draiva ol save putim meri i go insait long rum draiva. Na ol draiva ol save spitim ka tumas na ol draiva ol i no save long draivim ka bilong ol gut long rot.

Long Sarere namba 30 de bilong mun Oktoba mi lukim sampela wantok bilong mi bilong Watabung. Ol i kam long bikpela ka na ol kapsait long maunten klostu tasol long Asaro. Mi lukim ol wantok bilong mi na mi sori nogut tru long ol. Dispela taim ol faipela yangpela meri ol i dai na 3-pela lapun man tu i dai. Sapos dispela taim mi lukim ol haiwe draiva ol putim meri insait long rum draiva bai mi ripotim long plis stesin. Em tasol liklik wari bilong mi. Wantok Nius na mi ken save.

Gabriel Kuta  
Watabung.

## Smelim Lotu Inap


Dia Edita.- Wanpela pasin bilong yumi mi lukim na i no stret long yumi. Bipo taim tru inap i kam na nau yumi stap. Bipo ol misinari i kamap long ples bilong yumi. Na ol i kisim sampela man na skulim ol long tok pisin. Na ol dispela man ol i kisim liklik save. Na bihain ol i wok wantaim ol misin. Tasol bihain ol i les long wok bilong misin.

Na ol i go long gavman na tren long kain kain wok. Polis na dokta, na kuskus o ol kain wok. Na ol i lusim olgeta gutpela pasin ol misin i lainim long ol. Ol i save brukim marit na kisim No. 2 meri, na lap long ol misin. Taim bilong lotu long Sande ol i kam stap ausait long haus lotu na ol i tok. Mi smelim misa em inap. I olsem mi lotu long Sande. Mi smelim misa em inap.

Nau sampela yangpela man na meri tu ol i wok long taun o plantesin ol i no go long misa na onaim God. Ol i tok, olgeta de mi wok, nau mi mas sindaun nating long haus. Na pilai gita na dring bia na mi stap fri. Na tumora mi kirap long wok bilong mi na lotu long Sande maski mi kam sanap ausait long haus lotu. Na ol i pilai ausait long haus lotu.

Dispela pasin i no stret. Yu husat man na meri bipo yu skul long c.m. o Luteran misin o narapela kain lotu, yu bin stap long en. Orait long Sande yu mas go long lotu bilong yu stret na adorim God.

Joseph Heny-G.  
Buvussi W.N.B.



## Skelim ol Skul

Dia Edita.-Mi gat wanpela askim. Bilong wanem ol gavman i no wanbel wantaim mipela pisin skul. Tasol ol gavman skul ol klap i save laikim ol tru. Na ol skul inglis tu ol gavman i save laikim ol tru.

Tasol mi ting ol skul inglis i no bihainim gutpela lo tumas. Ol i save ai gris long ol yangpela meri, na pamuk gutpela pasin. Tasol mipela skul pisin mipela i save bihainim gutpela lo tru. Lo bilong gavman na lo bilong God.

Olsem long wok tu. Wok bilong gavman mipela pisin i no save holim liklik wok olsem long wok kapten na plisman o kuskus o stuakipa em samting olsem. Bilong wanem ol gavman i skelim mipela pisin skul?

Mipela i gat save. Mipela i gat wanem kain save na ol inglis skul i i gat wanem kain save. Wanpela kain save tasol.

Saimon Yukilau  
Lumi.

## Daniel, Yu Givim Mani

Dia Edita.- Mi laik bai yupela i putim toktok bilong mi i go long Wantok Niuspepa.

O yes brata, Daniel Hawina. Sapos yu laik helpim pipel bilong Is na Wes Sepik Distrik. Orait yu mas givim sampela mani i go long Dokta Gobias long bikpela haus sik bilong yumi, long Wewak. Bambang dokta i ken baim dispela X-Ray masin bilong T.B. seksen. Dispela masin i go raun long olgeta ples; long kisim piksa na sekap, hamas pipel i gat sik T.B. na dispela pipel i kisim dispela masin.

Dispela masin i kostim olsem \$18,000 dola (etin tausen dola). Long wanem mi harim i gat moa mani

liklik. Na tu mi lukim long sampela pepa, prais bilong mani i gat long en. Yu ken harim long Radio Wewak, planti hap bilong Is na Wes Sepik ol i wok long helpim o bungim mani long kisim dispela X-Ray masin. So brata em tasol liklik askim bilong mi.

Benny Sammy,  
Wewak.

## Senisim Kala Bilong Plak

Dia Edita.- Mi laik toktok long nupela plak bilong yumi stret, dispela nupela plak mi lukim i nogut liklik long kala bilong em. Retpela kala wantaim blakpela kala i nogut. Sapos ol i putim blupela kala wantaim grin kala bai i gutpela. Ol i putim retpela kala antap long plak na mi pret liklik. Nogut bai yumi gat taim nogut bihain long kantri bilong yumi New Guinea.

Na em hia tu kala bilong kumul tu i no stret, em i mas i gat braun liklik na wait liklik tu wantaim yelo. Em i kala bilong kumul. Ol dispela faipela sta mas stap namel long grinpela kala, em bai luk smat tru yet a! Sapos yu gat toktok rait tasol i kam long Wantok.

Francis Kapanombo,  
Wewak.

## Helpim Tok Bilong Bisop

Dia Edita.- Mi na pren bilong mi laik bekim pas bilong wantok John Keke bilong Morobe. Yes, wantok bilong wanem yu laik save long miting bilong ol bisop long Moresby? Bilong wanem bai ol bisop i mekim tok long mani? Ol i no holim beng mani. Em i no bisnis bilong ol long mani, Bisnis bilong ol em i bilong bringim gutnius bilong Jisas Kraist. Sapos yu krai tumas long mani,

yu mas go long gavman.

Ol bisop ol i gat rait long toktok long strongpela dring bikos ol i laik helpim sol bilong yumi.

Bikpela kusai bilong yu tru long tok olsem ol man i sot tru long pe na ol i no gat haus bilong ol, olsem na ol i save spak nabaut. Sapos ol man i sot long mani olsem wanem bai ol i ken baim ol strongpela dring? Yu save dring i kos bikpela mani tru? Yu no gat tingting long bagarapim nem bilong ol bisop. Yu kristen o haiden? Sapos yu laik bekim pas rait i go long Wantok. Sapos yu kristen bilong wanem yu kolim yu yet John. John i no pegan nem em i kristen nem.

Helen Ann Makom,  
Theresia Ann Kauni,  
Mt. Hagen.

## Toktok i Sting Tru

Dia Edita.- Plis mi laik bekim pas bilong brata hia, Vincent F. Paul bilong Lae.

Sori yu toktok long nupela bisnis. Mi pilim i no stret tru. Dispela toktok bilong yu em i sting tru. Bikos yu no tingting pastaim na raitim dispela toktok i salim i go long Wantok Nius.

Sori asua bilong ol sampela man tasol, yu mekim semim nem bilong Hailans. Sori brata mi yet mi no laik hepi long liklik save bilong mi, na tu long bilas bilong mi tu. Plis yu save olgeta meri bilong wold yumi save pinis, ol meri i no gat strongpela tingting bilong ol. Sapos yu go maritim wanpela na i stap wantaim yu, em bai i gat gutpela tingting. Tasol yu go long wanpela hap, em bai paulim yu. Na em bambai i sindaun wantaim ol sampela man.

Tingting bilong olgeta meri i no strong. I no long ol meri bilong Hailans tasol.

Sapos yupela ol man bilong nambis tasol i laik kisim selp gavman na larim ol busman i stap, i no inap. Na tu long busman i laik kisim selp gavman tu i no inap. Sapos yumi olgeta wok wantaim kantri bilong yumi Papua New Guinea bai i go antap. Bihain yu no ken mekim dispela tok.

Matthias Mende  
Kundiawa.

## Mani i Pairap

Dia Edita.- Tenkyu Wantok. Long namba 29-Trinde Oktoba 6 Wantok Nius long pes 4, yu raitim hap tok olsem. Sapos yu laikim save moa dispela tok MANI! Askim memba bilong Haus Asembli bilong yu yet. Yu ilektim i go long Port Moresby. Em i tok tru bilong em, em i save.

Dispela tok yu raitim i mekim mi wari moa. As bilong em i olsem. Mi raitim pinis tupela pas i go pinis long Wantok bilong prinim.

Mi bilong Manus. Na mi Manus man. Wanem yupela arapela memba bilong Open i ken amamas wantaim pipel bilong ples bilong yu. Na harim em i toktok long wanem samting ol i toktok long Haus Asembli long miting.

Tasol man man, Manus man yupela, yumi karanki man pinis. Lukim kaunsil i ken kam long ples. Kolim dispela tok Yuniti. Manus i lainim tok Yuniti! Mining bilong tok i no gat. Pairap bilong tok tasol.

As bilong em ilektet memba bilong mipela i dai pinis. Sevenpela yia i lus pinis mi no harim em. Paulim yumi antap bai yumi pipia. Maski paulim yumi laka? Tingim Papua New Guinea. Helpim em. Bai ol yangpela i kam sindaun gut na bihain tingim yu na onaim yu long bihaintaim laka?

Nick. S. Hipomson  
Manus Ailan



Ol skulmanki i hat moa long pinisim eksaminesen bilong ol. Nau tasol ol i lap na i malolo.



Meri i nais tru em i no mas pasim minisket. Sket i trikim ol pipei tasol. Mipela nogat.

(Jon)



Man i salim dispela poto i tok olsem: em hia i pasin bilong ol mama tru i mas lukautim pikinini

(Nevi)

## LUKIM GUT DISPELA HAP TOK

*Planti poto moa i bin kamap pinis.*

*Tasol planti i nogut tru, i no inap mipela i ken putim long niuspepa.*

*Mipela i no baim olgeta poto yu salim i kam long mipela. Nogat.*

**HARIM GUT. LUKIM GUT: MIPELA I BAIM OLGETA POTO MIPELA I PRINIM LONG DISPELA PES LONG NIUSPEPA. EM TASOL**

*Tasol yu traim. Ating yu gat sampela gutpela poto. Salim i kam. Yu ken winim wan dola.*

*Salim poto i kam long:* WANTOK  
P.O. BOX 298  
WEWAK


## PES BILONG OL PIKSA I WIN



Lapun i belhevi liklik. Olgeta samting bilong bipo i go pinis. Tasol watpo nau ol waitman i laikim ol samting em i sapim long tamiok ston?

(Grig)

# OLGETA HARIM GUT!



Dispela sop pauda, ol i kolim "COLD POWER" i nambawan tru. Em i wasim na rausim tru ol kainkain pipia long ol klos bilong yu.

Dispela sop pauda i gat wanpela kain strongpela marasin long en i save mekim save tru long rausim ol kain pipia – long ol klos.

Yu ken usim wara long tang or long wara nating. Dispela i kol wara. Sop "COLD POWER" i strong moa na i ken rausim ol pipia long klos bilong yu.



# TOKAUT

# BILONG

# PANGU

# PATI

## 1. SELP GAVMAN

Pangu Pati i bin kamap long yia 1967. Long dispela taim inap nau Pangu Pati i gat dispela wanpela tingting tasol: em i strong moa long kisim selp gavman. Na long kisim kwiktai. Nau tasol yumi mas skul long ranim gavman bilong yumi. Nau tasol ol lida bilong yumi ol Papua New Guinea i mas kisim dispela trening. Yumi yet i mas insait tru long olgeta wok bilong gavman. Yumi yet i mas kamap bosman tru bilong ol samting bilong kantri bilong yumi.

I gat sampela manmeri i laik subim tingting bilong selp gavman i go longwe yet. Maski long ol, bai ol i lus. Tru tumas, i no longtaim bai selp gavman i kamap. Na olsem yumi mas redi nau. Yumi mas mekim tripela samting bilong redi tru long selp gavman. Em hia:

### a.) Politikal Edukesen:

Em i min ol pipel i mas kisim gutpela save long ol wok politik na ol wok gavman na ol kaunsil. Na olsem tasol ol i ken save, selp gavman em i wanem samting na ol i no ken pret long en. Sapos ol i save tru long gavman bai ol i laik helpim wok gavman na wok kaunsil. Olsem tasol kantri bilong yumi i ken go het.

### b.) Moa lokal ofisa:

Em i min mipela i laik hariapim dispela pasin bilong ol Papua na New Guinea yet i ken holim bikpela wok insait long gavman. Ol i no ken holim namba tu o namba tri ples tasol. Nogat. Ol i mas kisim skul na trening bai ol inap tru

long kisim ol namba wan ples. Ol Papua New Guinea i no mas kisim nem nating bilong wanpela wok. Nogat. Ol i mas kisim strong na pawa tru bilong mekim dispela wok. Ol i mas ofisa tru tru.

### c.) Ol politikal Pati:

Pangu Pati i bilip gavman bilong Papua New Guinea na gavman bilong Australia, tupela wantaim i mas orait long kain kain politikal pati i ken kamap long dispela kantri. Gavman i mas helpim ol na skulim ol long ol pasin politik. Sapos yumi laik bihainim tru pasin bilong gavman yumi bin kisim pinis long Australia, yumi mas gat sampela strongpela politikal pati i stap insait long kantri bilong yumi. Ol politikal pati i ken strongim tru gavman bilong kantri na i ken bungim olgeta mammeri bai ol inap wok wantaim.

## 2. GRAUN:

Mipela ol Pangu Pati mipela i bilip olgeta graun bilong Papua New Guinea i bilong ol man bilong Papua New Guinea stret. Sapos yumi no stretim ol dispela wari na pait bilong graun nau tasol, bihain long selp gavman bai i gat bikpela trabel moa. Pangu Pati i laik bai wanpela nupela kot i mas kirap. Em bai wok long painimautim as tru bilong ol pait bilong graun. Dispela kot i mas wok tu long painim rot bilong stretim pe i go long ol papa bilong graun, em gavman na kampani i bin kisim pinis bipo. Dispela kot i mas save gut long ol bilong gavman. Tasol em i mas mekim wanpela sam-

ting moa. Em hia: Em i mas autim long gavman olgeta lo bilong graun ol tumbuna i bin mekim. Tupela kain lo i mas skel wantaim. Pangu Pati tu i laik bai i gat wanpela bikpela komiti i mas raun na stretim olgeta tok na kros bilong graun.

## 3. EDUKESEN:

Pangu Pati i strong long dispela tingting: Olgeta boi na meri i mas skul inap long fom 2. I no samting bilong ol, em bai i lo. Nau i gat planti boi na meri i no ken go het, long wanem i no gat inap haiskul. Kain yangpela pipel olsem i hapim save bilong ol tasol, na ol i no inap painim wok. Olsem ol i bel nogut, ol i sindaun nating nabaut long ol ples na taun, ol i save painim planti kain trabel. Pangu Pati i strong long kirapim sampela moa teknikal na vokesenel skul. Pangu Pati tu i laik bai olgeta tisa i mas skulim ol sumatin long ol pasin bilong wok didiman na long wok bisnis. Olsem bai ol skulboi na skulmeri i ken mekim gutpela wok long ples taim ol i lusim skul pinis.

## 4. WOK BISNIS:

Pangu Pati bai i hat tru long kirapim ol kain kain wok didiman bilong helpim ol pipel i stap long ples. Pangu i hat tu long helpim bai moa faktori i ken kirap.

Pangu Pati i no laik yumi mas baim olkain samting olsem mit, pis, rais, suga, lip ti long ol arapela kantri. Nogat. Yumi inap kamapim ol dispela samting long graun bilong yumi yet. Pangu i strong long helpim ol man bilong dispela kantri yet long mekim kamapim ol dispela samting. Na tu Pangu i

laik painim maket bilong salim ol dispela samting.

Pangu Pati i laik bai ol Papua na ol New Guinea i mas insait tru long olkain bikpela wok bisnis na wok didiman. Na ol i mas kisim tu gutpela hap profit o win mani bilong ol stret.

Pangu Pati i laik tru long helpim ol Papua na ol New Guinea long kirapim bisnis bilong ol yet. Na Pangu i ting i mas gat sampela beng i laik givim dinau long ol fama i gat liklik bisnis didiman tasol.

## 5. PE BILONG WOK:

Pangu Pati bai i wok hat long apim pe bilong olgeta wokman na wokmeri bilong Papua New Guinea. Pangu i bilip olgeta wokman i mas gat gutpela ples bilong wok na olgeta wokman i mas sindaun long gutpela haus. Olsem tasol man i ken hepi. Na Pangu i bilip olsem: Man i hepi na i amamas long wok bilong en, em inap mekim gutpela wok tru. Bosman o kampani i save mekim gut long ol wokman bilong en, dispela kampani yet i win.

Pangu Pati i orait long olkain asosiesen bilong ol wokman i ken kamap. Pangu tu i orait long ol gutpela tingting na gutpela toktok bilong ol. Pangu i laikim tumas bai olgeta wokman na olgeta bosman i ken wok gut wantaim.

## 6. YUMI MAS GAT SIP BILONG YUMI YET:

Olgeta taim yumi ol Papua New Guinea i laik salim ol samting bilong yumi i go, yumi lusim planti mani tumas long baim ol sip. Ol sip hia i bilong ol arapela kantri. Pe bilong ol i antap moa. Olsem Pangu i ting mobeta dispela kantri i gat wanpela lain sip bilong en stret. Olsem ta-  
(Ritim moa long pes 15)

# TOKAUT BILONG YUNAITET PATI

As tingting bilong Yunaitet Pati em hia: bungim Papua na New Guinea bai tupela i kamap wanpela kantri, i gat wanpela Haus Asembli na wanpela gavman tasol.

Yunaitet Pati i no laik Papua New Guinea i brukbruk nabaut long kisim selp gavman. Nogat. Olgeta hap i mas bung wantaim na kisim selp gavman wantaim. Olsem tasol yumi ken stap strongpela kantri tru.

## TOK PLES

Papua New Guinea i gat 700 kain kain tok ples. Em ol hia i planti tumas long bungim olgeta hap bilong dispela kantri na mekim em i kamap strongpela. Olsem yumi mas orait long 3-pela tok ples, planti pipel moa i save pinis long ol. Em hia: Inglis, Pisin, Motu.

Dispela 3-pela tok inap long karamapim ol 700 arapela. Yunaitet Pati i laikim ol Papua na New Guinea manmeri i no ken sem long dispela 3-pela tok. Yumi wan pipel, wan gavman wan Haus Asembli, na wan kantri. Orait, yumi ken tok long 3-pela tok ples.

## STAP LONG OLGETA HAP

Yunaitet Pati i autim pinis polisi o as tingting bilong en bilong ranim gut gavman bilong Papua New Guinea. Dispela pati i gat sampela han bilong en long planti hap bilong Papua New Guinea na i wetim sampela nupela aidia i ken kamap tu long ol han bilong Pati.

Mipela ol memba bilong Yunaitet Pati i laik bihainim tingting bilong ol manmeri bilong dispela kantri, ol manmeri i stap long ples, long stesin, long skul, long kaunsil. Yumi bihainim ol lida tu.

## SELP GAVMAN

Sapos ol man na meri i laikim selp gavman i kamap kwiktaim, orait mipela memba bilong Yunaitet Pati i ken bihainim laik bilong ol yet. Yunaitet Pati i no

bihainim tingting bilong ol memba bilong Pati tasol. Ol arapela pati i mekim olsem na i bihainim tingting bilong ol yet na i toktok long kisim selp gavman kwiktaim. Yunaitet Pati i pilim em i no stret na i paulim tingting bilong ol manmeri bilong dispela kantri.

Yes, mipela ol memba bilong Yunaitet Pati i laikim selp gavman, tasol mipela i no laik daunim tingting bilong ol manmeri, olsem na mipela i no laik hariap na tu i no laik go isi isi tumas.

Olsem tasol Yunaitet Pati i gat taim bilong skelim gut pasin bilong ol lokal ofisa i kisim wok pinis insait long gavman na bisnis. Yunaitet Pati i no save long wanem taim bai i gat moa lokal ofisa.

Bihainim ol dispela kain lokal ofisa i kisim namba na i wok gut long mekim go het kantri, na olgeta manmeri bilong Papua New Guinea i ken lukim gutpela pasin na save bilong ol, orait, ol pipel yet i ting yumi inap nau long kisim selp gavman. Orait, nau Yunaitet Pati tu i orait wantaim ol.

## OL DISTRIK I SKEL

Yunaitet Pati i laik bai ol man bilong olgeta distrik i ken kisim olgeta kain wok. Yunaitet Pati i ting em i no stret sapos ol man bilong sampela distrik tasol i holim ol bikpela wok insait long gavman. Pati i pilim ol arapela distrik bai i bel hevi na i wari.

Yunaitet Pati i laik bai olgeta man na meri i winim pinis ol bikpela skul i ken kisim tu ol bikpela wok insait long gavman na bisnis.

Sapos yumi laik mekim go het tru dispela kantri inap long kisim selp gavman, yumi mas strong tru long ol dispela kain samting hia:

## 1. EDUKESEN:

Yumi tingting long ol praimer skul, ol haiskul na ol bikskul tru, na ol vokesenel skul. Yunaitet Pati i laik bai ol distrik, na sap distrik, na patrol pos bilong Papua New Guinea i mas gat kain kain skul long en. Yunaitet Pati i laik gavman i mas inapim ol skul long olgeta hap.

Yunaitet Pati i wari tru long ol boi na meri i lusim skul na i no pinisim fom 3 na fom 4. Gavman i mas tingting na lukaut long ol dispela boi na meri. Yunaitet Pati i laik ol yangpela boi na meri i mas tren long olkain wok. Pati tu i laik ol i mas go long ol arapela kantri bilong kisim trening na kam bek gen na wok long Papua New Guinea.

## 2. BISNIS:

Yunaitet Pati i pilim go het bilong dispela kantri em yet i ki bilong strongim Papua New Guinea. Yunaitet Pati i laik bai wok didiman i mas kirap strong long olgeta hap bilong Papua New Guinea, na olgeta manmeri i mas kisim gut save bilong wok bisnis.

Olsem na Yunaitet Pati i laikim gavman i tingting gut long mekim go het ol wok bisnis long olgeta hap bilong dispela kantri. Yunaitet Pati i ting planti long pulim planti turis o man i kam limlimbur nabaut bai ol i kam lukim Papua New Guinea.

## 3. PABLIK SEVIS:

Pablik sevis em i min ol manmeri i wok insait long olgeta hap bilong gavman. Yunaitet Pati i bilip ol dispela manmeri i olsem bun tru bilong gavman. Yunaitet Pati i laik bai ol manmeri bilong Papua New Guinea yet i mas holim ol bikpela wok tu insait long gavman. Tasol ol waitskin ofisa i no ken lusim mipela inap mipela i kisim pinis gutpela save long olgeta bikpela wok bilong gavman.

## 4. OL POLITIK:

Yunaitet Pati i laik bai olgeta pipel i mas kisim gutpela save long olgeta wok bilong gavman. Yunaitet Pati i laik bai ol lokal ofisa i mas kisim tu ol bikpela wok insait long gavman. Ol i mas kisim trening na save tru inap long dispela kain wok.

Yunaitet Pati i bilip Papua New Guinea i ken kisim selp gavman long dispela pasin tasol: planti lain manmeri na planti memba bilong Haus Asembli i mas orait pastaim long wanpela wanpela pawa Australia i laik givim long yumi.

## 5. LO NA ODA:

Yunaitet Pati i laik bai ol plisman i mas kisim gutpela trening tru bai ol inap bosim ol lo.

Yunaitet Pati i laikim olgeta manmeri i mas save gut long olgeta lo bilong dispela kantri. Pati i no laik ol i hambak long ol lo bilong yumi.

Yunaitet Pati i pilim dispela kantri i no inap go het gut sapos ol pipel i kalapim ol lo na i no laik bihainim ol. Yunaitet Pati i bilip gavman i no ken trikim ol manmeri long olkain trik lo. Gavman i mas wokim lo i stret na i klia bai ol

(Ritim moa long pes 15)

**LOT NUMBER**  
68/5050

**Australian Importer's Bulletin**

**LIMITED OFFER**  
Subject to Terms Below

\*\*\*\*\*

Spring, 1971, Edition

\*\*\*\*\*

# CLEAROUT OF SWISS AMPHIBIAN WATCHES HELD IN AUSTRALIAN GOVERNMENT BONDED

## WAREHOUSE **\$15.99** ONLY **ONETOA** LIMIT: **READER**

### FORCED TO SELL ENTIRE STOCK OF 1971 MODEL FOR ONLY A FRACTION OF THE REGULAR PRICE

The Bargain Clearout Offer described in this Australian Importer's Bulletin is for a short time only. Special discount prices apply only to men's 1971 deluxe model. Genuine Amphibian Watches have long been a favourite of Scuba Divers and active men throughout the civilised world. Goods have been held in Australian Bonded Warehouse, due to non-payment of storage and customs taxes. Now at last they are being released direct to the public at a fraction of regular prices. Watches sold on a first received, first mailed basis. Fast delivery assured. All orders processed within 48 hours of receipt. **LIMIT: Only ONE (1) watch to a reader at this reduced price.**

#### BRAND NEW 1971 DELUXE MODELS

These Scuba Divers' watches are brand new, in original factory packing. New, unbreakable Ebeilium mainsprings. New, heavy-duty cases with rear closures of rugged, thick STAINLESS STEEL. Each watch absolutely WATER RESISTANT—hermetically sealed, then depth tested under water. These watches are warranted to withstand 6,000 POUNDS (3 TONS) of undersea pressure per sq ft surface. Every watch has been equipped with a rugged INSULATOR—the time-honoured Swiss invention that gives it exceptional resistance to shocks, jolts, and constant rugged use. None offered to stores or watch jobbers.

#### AMAZING COMPUTOGRAPH DIAL HAS MANY SPECIAL APPLICATIONS

A unique, revolving COMPUTOGRAPH Dial is mounted on the outer rim of the Amphibian. This great development of Swiss technology has numberless applications in industry, business, sports, and the professions. Aids in timing speed of boats, cars, auto races. Useful for shop operations, photo-lab work, football, soccer, boxing. Special Lapsed Time function reminds of dates, business appointments. Reduces overcharges on phone calls. Prevents overtime parking fines. *Over 97% of all watches made do not yet have this great modern convenience.*

#### ONE OF THE WORLD'S STURDIEST WATCHES EVER DEVELOPED IN OVER 300 YEARS

The Amphibian was originally made for deep-sea divers or frogmen. Their very lives could depend on a rugged, heavy-duty watch. Therefore, the clever watch masters of Switzerland engineered it to withstand staggering stresses and pressures—without crushing or breaking down. To accomplish this, they gave it unusual resistance to shocks, jolts, bumps, accidents. They put in a special



SHOWN BELOW IS GUARANTEE GIVEN WITH EACH AMPHIBIAN WATCH

### 5-year Guarantee

All defective parts furnished at no cost to you. This includes jewels, springs, staffs, balances, gears, etc. Small

**LIMITED OFFER—WILL NOT BE REPEATED**



**STRONGLY DISCOUNT COUPON (below) at once. Upon receipt of same, one (1) watch will be mailed to each purchaser. Description of watch and full details of this importer's clearance offer are printed below.**

**SPECIFICATIONS OF WATCH OFFERED IN THIS BULLETIN**

The following are detailed specifications for this nationally advertised watch. (A) TYPE: Genuine Amphibian—ideal for use on land, undersea, or in space. (B) CASE: Standard diameter—measuring 1 1/2 inches across. Ruggedly made with a special Bolt-On back of 100% stainless steel, burnished to a satin finish. Latest Astronaut-inspired design. (C) WORKS: Precision Swiss parts assembled in a renowned factory in TRAMELAN, Switzerland. Movement has integrated calendar section that changes date every 24 hours at

the stroke of midnight. Works are inspected and electronically timed before insertion into the case. (D) WATER RESISTANT: This amazing watch is water resistant (not just "semi" water protected). User needs only to keep crown, case and crystal intact to preserve water resistance. Special internal rubber seals keep out water, dust, grime and grit—the four great enemies of watches. (E) BUILT-IN RESISTOR: This device gives positive resistance against damage from shocks, rough usage, jolts, etc., etc.

**USED BY ACTIVE MEN IN OVER 25 COUNTRIES**

This amazing watch is not used only by Scuba Divers. Well over a million men—in all walks of life—own Amphibian watches. These are executives, professionals, business leaders who are tired, frustrated and angry with fragile, flimsy watches that are always breaking down. You'll also see this type of watch on the wrists of brawny construction

men at work, army and naval officers, aviators, golfers, bowlers, tennis players, etc. Famous in over 25 countries round the globe, it's truly a prized possession for men of action—a masterpiece of contemporary design! Makes an excellent birthday or Christmas gift. Now available to you at a deep-cut, clearance price—while current warehouse stock is available.

**Listing of Some of the 35 Special Features Found in this Watch**

- Hermetic Pressure-sealed Case
- Guaranteed Water Resistant\*
- Built-in X-7 Shock Resistor
- 50-minute All-purpose Timer
- 3 Luminous Timing Hands
- Rotating Outer Dial
- 2 Independent Dials
- Precision Second Calibrator
- Date-O-Matic Calendar Window
- Glowing Underwater Dial
- Checks and Times Parking Meters
- Bonded Unbreakable Crystal
- Built-in Lapsed Time Computer
- Anti-magnetic Movement
- Ebeilium Unbreakable Main Spring
- Solid Stainless Steel Screwback
- Times Factory Operations
- Times Horse and Auto Races
- Business Appointment Reminder
- Tropical Rot-proof Strap
- Fine Jewellers' Finish Casing

\*Provided case, crown and crystal are intact.

strong it takes months, even years of treatment that could ruin an ordinary watch in 5 minutes. A watch so dependable and well-engineered that it carries a 5-year Service Certificate.

**FREE 7-DAY EXAMINATION**

Purchasers may examine, use and try one (1) watch without risk or obligation. This timepiece is absolutely guaranteed to give satisfactory performance. Otherwise return for immediate refund by return mail.

**PLEASE OBSERVE CAREFULLY**

This is a strictly LIMITED CLEAROUT OFFER. It is subject to all the Rules and Conditions shown in coupon. Please do read and follow these easy rules. This will prevent delay and ensure prompt delivery to your home.

**TO ORDER WATCH, PLEASE USE THIS SPECIAL PROCUREMENT COUPON**

To Classique Imports, P.O. Box 75, Red Hill, Qld. 4059.

**RULES AND CONDITIONS**

(PLEASE OBSERVE WITH CARE)

1. Only ONE (1) genuine Amphibian watch per reader at special discount price of \$15.99
2. No phone or C.O.D. orders.
3. Add 80 cents for postage, handling and full insurance to your home. Deluxe Gift Box and 5-year Guarantee Certificate given with watch.
4. 7-day free examination and trial permitted. Satisfaction guaranteed or money back.
5. This offer is for prompt acceptance. Orders received too late will be returned immediately to sender.

Print Name.....

Address.....

City.....

State.....

Postcode..... EN 316 BT

Katim dispela tiket na salim wantaim sek inap \$16.79 i go long:

Classique Imports  
P.O. Box 75  
RED HILL, QLD. (4059)

Watpo yu salim \$ 16.79 i go ...  
Hanwas i kostim ..... \$15.99  
Bilong baim pos ..... .80  
\$16.79

WANPELA KAMPANI BILONG AUSTRALIA I SALIM DISPELA TOK I KAM LONG MIPELA BAI MIPELA I PRIMIM LONG NIUSPEPA NA OL RIDA I KEN BAIM DISPELA HANWAS. OL I NO GAT PLANTI. YU KEN BAIM WANPELA BILONG YU STRET. HARIAP.

Samting bilong man o meri i smat moa .....  
Blakpela hanwas i lait long nait.....  
I no ken bruk inap 5-pela yia .....  
Yu ken swim wantaim em.....

*Ol rida, yupela i no ken lusim ting long baim kastam ta'im was i kam long Australia.*

# TOKAUT BILONG PIPELS PROGRES PATI

Pipels Progres Pati bilong Papua New Guinea em i wanpela lain pipel i bilip strong moa long dispela samting: Yumi olgeta i mas wok wantaim na yusim gut tru olgeta gutpela samting i stap long dispela kantri na aninit long graun bilong en. Ol dispela samting i mas helpim yumi olgeta long go het.

## AS TINGTING:

Em hia ol as tingting na aidia na program bilong Pipels Progres Pati:

### 1. GAVMAN:

Pipels Progres Pati i laikim kain gavman yumi gat nau. Em hia: olgeta pipel yet i ken autim laik bilong ol, na gavman i mas harim dispela laik sapos planti man tumas i laikim wanpela samting. Gavman tru em i Haus Asembli yet. Em yet i bosim kantri. Kantri tu i gat wanpela lo tasol long olgeta kain man.

### 2. MAN I FRI:

Pipels Progres Pati i laik mekim kamap wanpela pipel na wanpela kantri tasol. Dispela pipel i fri. I no gat man o lo i ken pasim ol long autim tingting bilong ol yet, o long bihainim lotu bilong ol yet. Nogat. Dispela kantri i mas bihainim ol gutpela tingting bilong Yunaitet Nensens tasol.

### 3. LOKAL GAVMAN:

Pipels Progres Pati i laikim tumas bai i gat strongpela gavman. Tasol ol lida i mas bihainim laik bilong ol pipel. Haus Asembli yet i mas bosim ol pipel. Tasol i mas gat strong tu insait long ol lokal gavman kaunsil.

### 4. OL PLES GO HET:

Pipels Progres Pati i laik yumi mas helpim ol ples tu i ken go het, i no ol taun tasol. Tupela i mas go het wantaim na wankain.

### 5. GRAUN:

Pipels Progres Pati i strong long dispela samting: olgeta manmeri inap baim na holim graun na haus na ol samting. Na i no gat narapela man i ken stilim. Ol man i ken sindaun gut na i no ken pret long wanpela samting. Progres Pati i laik lukim moa moa man i kirapim bisnis bilong ol yet.

### 6. BISNIS:

Pipels Progres Pati i laikim bai planti bisnis moa i kamap, olsem bai olgeta man inap long painim wok.

### 7. SKUL:

Pipels Progres Pati i bilip olgeta man o meri i mas kisim skul inap tru long save bilong ol. Dispela save i mas helpim go het bilong kantri. Progres Pati i laik bai yumi mas skulim ol ofisa moa moa yet taim ol i stap pinis long wok bilong ol. Yumi tu i mas putim laik bilong kisim save insait long het bilong ol manmeri.

### 8. OL TARANGU:

Pipels Progres Pati i laik bai yumi wokim tu sampela skul bilong givim save long ol tarangu manmeri i aipas o yaupas o han lek nogut. Olsem bai ol tu i ken helpim go het bilong kantri inap long strong bilong ol yet.

### 9. PASIN TUMBUNA:

Pipels Progres Pati i laik yumi no ken lusim

olgeta pasin na save na tok ples bilong ol tumbuna. Ol pikinini i mas lainim ol dispela samting, tasol ol tu i mas kisim bikpela save moa long ol nupela samting i ken helpim sindaun bilong yumi moa moa yet.

### 10. AMI:

Pipels Progres Pati i bilip yumi mas wok gut wantaim na sambai long Australia long olkain wok lukaut bilong ol ami na nevi samting. Yumi tu mas wok wantaim olgeta kantri bilong Asia na wantaim ol wansolwara bilong yumi.



## Apim Prais Bilong Kopra

Mista B. E. Fairfax-Ross, Siaman bilong kopra bot, i tok bai gavman i helpim olgeta kopra fama. Em bai skruim \$10 (ten dola) long wanpela wanpela tan kopra. Dispela bai bigin long namba wan de bilong Desemba.



## Laikim Graun Hariap

Long Wes Nu Briten i gat 130 blok graun yu ken kisim long gavman. Wanpela wanpela inap long 15 eka.

Hariap, yu go long ofis bilong LANDS DEPARTMENT long biktaun bilong yu.

Hariap; pas bilong yu i mas kamap long Moresby inap de namba 15 bilong Desemba.

## Misin Pasim

### Haiskul

Katolik Misin bilong Kavieng i bin pasim haiskul bilong en long mu Oktoba long Manus Ailan Nem bilong haiskul hi Papitalai.

Tokman bilong misin tok wanpela man i bi kilim wanpela tisa bi long Englan, nem bilong em Sandra Creswell-Smit. Em i bin mekim long api nun long rot i go long Lombrum.


Plis i bin holimpa wanpela man tasol long bikpela kot tok bilong em i win. Planti lokal pipel i pilim samting: no stret. Long waner long dispela hap bilong Manus yet, i gat 3-pela arapela man ol i bi kilim indai pinis long sampela yia i go pinis. Na oltaim ol i no painim kilman.

Misin i tok sapos gavman i putim wanpela patrol pos bilong ol plis klostu long skul bai ol i opim bek.

Planti ol Manus long ol biktaun Port Moresby, Lae, Rabaul, Wewak, Goroka, na Madang i kirap nogut tru long dispela tok na i kibung bilong harim tok bilong Pater Misso, wanpela pris bilong Manus stret.



Pater Misso



## Vanimo Bai Biktaun

Wanpela bikpela kampa-  
ni i laik bosim ol bik-  
us long hap bilong Va-  
nimo, klostu long arere  
wilong Wes Irian.

Nem bilong dispela  
kampani Wes Sepik Deve-  
lopmen Kampani.

Bus hia i bihainim  
nambis inap 40 mail na i  
go insait inap 25 mail.

Sapos ol inap stretim  
tok bilong dispela, bai  
ol i wokim wanpela bik-  
pela somil na bikpela  
bris tru long Vanimo.

Tasol inap nau gavman

i no yesa long dispela  
nupela bisnis bikos kam-  
pani hia i no baim gut  
ol lokal pipel long dis-  
pela graun bilong ol.

Sapos ol inap stretim  
dispela tok, bai Vanimo  
i kamap biktaun tru.

## Nambawan Bisnisman

Namba wan lokal bisnis  
man tru bilong hap bi-  
long Kaiapit em Mista  
Timas Paia.

Pastaim tru long 1950  
samting em i wok long  
planim kasang o pinat. Ol  
wok bilong em i ran gut.

Nau em i go long Devel-

opmen Beng na i dinau  
long \$4,000. Em i long  
yia 1969. Orait em i baim  
4-pela pikinini bulmakau  
meri.

Long dispela yia em i  
bekim bek dinau na em i  
kisim gen dinau inap  
\$5,600. Dispela taim em  
i baim 60 kain kain bul-  
makau. Nau fam bilong em  
i gat 100 bulmakau.

Long ol gaden kasang  
bilong em tasol, em i  
bin winim inap mani long  
baim 2-pela trakta.

Em i gat 206 eka graun  
na nau em i laik planim  
ol kokonat tu.



MIS RAPHAELA GASMARENG

bilong Nu Ailan nau ta-  
sol i kam bek pinis long  
ailan Fiji. Em i pinisim  
wanpela kos long skulim  
ol meri long ol vokese-  
nel skul.

Em hia sampela samting  
em i skul pinis long en:  
pasin bilong kukim ol-  
kain gutpela kaikai, bi-  
long lukautim gut ol pi-  
kinini, bilong samapim  
olkain samting, bilong  
lukautim gut mani bilong  
famili.

Mis Gasmareng i tok i  
gat 34 meri i skul wan-  
taim em long dispela ko-  
muniti Edukesen Trening  
Senta long ples Suva. Ol  
i kam long planti kantri  
i wansolwara bilong yumi.


Mis Gasmareng i tren  
long tisa long Kabaleo  
Koles klostu long Rabaul  
na i kisim setifiket bi-  
long en long 1967.

Em i tok ol papamama  
bilong Fiji i save takis  
moa long skul olsem long  
Papua New Guinea.


## Ol Memba Makim P.N.G.

Namba wan gavman, Mr. L.  
W. Johnson i tok, 4-pela  
memba i makim Papua New  
Guinea bai i go long  
Yunaitet Nesens. Nem bi-  
long ol: Mr. Tom Leahy  
tokman bilong kaunsil  
bilong namba wan gavman;  
Mr. Angmai Bilas, Minis-  
ta bilong Tret na Indas-  
tri: Mr. J. A. Brown, na  
Mr. Leo Morgan. Ol i in-  
sait wantaim ol deliget  
bilong Australia.

# Saun bilong SANYO gutpela tumas



Sanyo i ken mekim yu  
makim draipela redio, stat  
long 8 transista i go kamap  
draipela samting tru em  
inap long kisim stesin long  
we. **Wonem kain samting  
yu laikem long harim,  
Sanyo i gat.**



Soim istap antap emi piksa bilong  
11XA853. Emi namba wan 10  
transista redio bilong harim tok  
long olgeta graun. Long han rait  
emi 8 transista redio ino hevi na  
isi gutpela redio em bai klia saun  
sapos yu kisim long we stesin.

**LUKIM SANYO  
ISTAP LONG STUA  
LONG HAP BILONG YU**

**BRECKWOLDT & CO. (N.G.) PTY. LTD.**

Port Moresby,  
Box 1549,  
Boroko.

Madang,  
Box 185.

Lae,  
Box 557.


Rabaul,  
Box 222.

Mt Hagen,  
Box 237.

Wewak,  
Box 178.

Kieta,  
Box 72

# Papua New Guinea News



## Ol Lukautim Moa Doktaboi

Dipatmen bilong wok dokta o Pablik Helt i tingting long kirapim wampela skul bilong ol et pos odeli long Mt. Ambra long Westen Hailans.

Dispela trening senta bai i op long Janueri. Ol i tingting long kisim 60 man olgeta.

Dipatmen bilong Pablik Helt na ol Lokal Gavman

Kaunsil yet bai i makin ol dispela man. Ol i magat 17 yia, na ol i maninim stendet 6 long skul.

Dokta Lewis bilong Mt. Hagen i tok olsem, husat ol man i laik kisim wok olsem et pos odeli, ol i ken go na lukim Pablik Helt Ofis klostu long ol. Na tu ol i ken askim long haus sik, o long helt senta i stap klostu long ol, ol i ken lukim Lokal Gavman Kaunsil Ofis bilong ol.

MISIS MURIEL CUMPSTON I KISIM BLUT LONG HAN BILONG MEDIKAL ASISTEN JOHN EKODA BILONG BOUGAINVILLE KOPA KAMPANI.

Hia long kampani i gat 250 pipel i bin givim blut bilong ol i go long haus sik bilong helpim ol manmeri i lusim planti blut pinis.

I gat dispela kain beng bilong blut long ol ples hia: Madang, Wewak, Mt. Hagen, Goroka, Rabaul Lae, na Port Moresby.

## Brus Bilong Teritori Nambawan Moa

Bikpela kampani bilong wokim ol sigaret, nem bilong em Rothmans, i ting long kirapim bikpela wok long planim brus bai yumi ken wokim ol sigaret hia long tabak bilong Papua New Guinea stret.

Kampani hia i gat wampela bikpela fam o gaden klostu long Asaro/Goroka na long 1968 inap nau ol i bin bungim 52,000 paun lip tabak. Ol lip hia i mas drai inap 3-pela yia bipo ol i ken tanim long sigaret.

Ol hetman bilong kampani i amamas tru long dispela tabak na i laik skulim ol lokal pipel long pasin tru bilong planim tabak. Wampela man i bin bungim 1,000 paun lip tabak insait long 6-pela mun tasol.

# NAMBA WAN TIM LONG TERITORI

Long gutpela tim olgeta man i mas bung na wok wantaim.

Wampela wampela i mas save gut long wok bilong poroman bilong em. Dispela em i pasin tru bilong Ansett Airlines bilong Papua New Guinea.

Yu ken pilim: mipela olgeta manmeri bilong Ansett, mipela i bung wantaim, i wok wantaim.

Yu kam long ofis na yu laik baim tiket.

Wantu, yu ken lukim mipela i gat planti saveman moa.

Man o meri i raitim tiket bilong yu, man i makim ples bilong yu long balus, man i kisim kago bilong yu,

mekanik i redim balus, ol kagoboi bilong balus,

ol boskru bilong balus, kepten bilong balus -


olgeta manmeri hia ol i save moa long wok bilong ol stret.

Ol i olsem wampela tim tru.

Ol i win moa.

Tru tumas:

ol i namba wan tim long dispela Teritori.




# ANSETT

AIRLINES OF PAPUA NEW GUINEA

in conjunction with ANSETT AIRLINES OF AUSTRALIA

2131/154

# Holide



Skul i laik pinis nau. Ol tisa i laik malolo na go bek long ples. Ol sumatin i gat taim nau long mekim ol planti kain kain samting ol i no inap mekim long taim bilong skul. Sampela bai i raun lukim ol wantok. Sampela bai i go holide wantaim ol pren. Sampela moa bai i go sindaun wantaim brata o kandere.

Taim bilong holide i wankain long olgeta arapela taim, I gat lo bilong en stret. Yumi save i gat lo bilong bosim taim bilong wok, taim bilong skul, taim bilong pilai. Orait, taim bilong holide tu i wankain. I gat long bilong en. Na sapos yumi bihainim gut dispela ol lo, bai samting i ran stret.

Mi pilim i gat 3-pela lo. Em hia:

## 1. GO BEK LONG PLES.

Long taim bilong holide i no stret sapos yu sindaun long taun tasol na pinisim kaikai bilong ol wantok. Maski, yu amamas long ol gutpela sam-

ting bilong taun, olsem piksa, kaikai, loli. Holide em i taim bilong go bek lukim ples bilong yu liklik, sindaun wantaim famili, bratasusa. Papa tupela mama i no lukim yu planti long taim bilong skul. Yu go sindaun liklik wantaim ol, toktok na stori wantaim ol.

## 2. HELPIM PAPANAMA

Ol papamama i hatwok tru long salim ol pikinini i go long skul na baim skul bilong ol. Orait, holide em i taim long ol pikinini i ken bekim liklik ol hatwok bilong ol papamama. Holide em i taim bilong helpim papa long wokim nupela haus, o katim bus bilong gaden, o wokim haus paia bilong kopra.

Em i taim ol meri i ken helpim mama long gaden na karim bilum tu. Olsem wanem planti boi na meri i sem long ol pasin bilong ol papamama?

## 3. PAINIM MANI

Holide em i taim bilong painim liklik wok bilong winim mani inap long baim skul. Yu save,

pe bilong ol skul i go antap moa nau. Bai ol famili i painim we? Nating, planti i no inap. Olsem holide em i gutpela taim bilong painim mani. I no stret sapos yu winim sampela mani na yu pinisim long laik bilong yu tasol.

Olsem yupela ol suma-

tin i mas tingting: i gat 3-pela lo bilong bosim holide bilong yupela: go bek long ples, helpim papamama, winim sampela mani.

Orait yupela i yusim gut dispela taim bilong holide bai bel bilong papamama i gut long yupela. Em tasol.

# Skulim ol Lida

Luteran Misin long Lae i putim wanpela kibung long ples Waritsian Klostu long Kaiapit bilong skulim ol yangpela pipel long pasin bilong kamap gutpela lida.

I gat 44 tisa na kaunsila na sumatin na man bilong ples i kam long dispela skul. Na narapela 62 pipel i kam harim ol toktok bilong pasin bilong ranim ol klap bilong ol yangpela pipel.

Pasto Jack Reents, man bilong ol wok wantaim ol yangpela pipel

long Lae, i bosim dispela kibung. Mista Kaidang Sishoi na Mista Kiki Ahi bilong Butibum Viles, tupela i helpim long skulim ol man.

As tingting bilong dispela kibung em bilong kamapim olkain klap bilong ol yangpela pipel - o yut klap - insait long olgeta viles na ples nabaut.

Yut Klap em i gutpela pasin tru bilong helpim gut sindaun bilong ol yangpela manmeri i stap long ples.

 **NATIONAL**  
**PORTABLE RADIOS**




THE NAME IS **NATIONAL**

**NATIONAL** is the best radio

you can buy. **NATIONAL** is

the best value

for money.



ASK FOR NATIONAL

AT YOUR NEAREST STORE.

THE NAME IS **NATIONAL**

**Burns Philp (N.G.) Ltd.**


for service and real value.

Wantok - Trinde, Desemba 1, 1974 - pes 13



Minista bilong ol nius na toksave (Dipatmen bilong Infomesen na Ekstensen Sevisis), Mista Donatus Mola wantaim Mista Bill Fielding (Siaman bilong Pablik Akauns Komiti bilong Haus Asembli) tupela i harim namba wan taim ol wailes insait long haus pos long Arawa, Bougainville.





Wanpela helikopta bilong Ami bilong Australia i flai na i wet i stap....na ol soldia i go daun long graun long ol baklain. Ol soldia hia em ol i bilong wanpela lain spesel soldia i mekim wok bus na patrol long hap bilong Dagua na long Sepik Plains. Ol i bilong Wes Australia. Pasin hia bilong surik long ol baklain na kam daun em i pasin bilong helikopta i putim ol soldia i go daun long hap i gat planti maunten.




**LONG**

**MADANG**

**YU GO LUKIM**

**GRAHAM KIRKHAM**

**BILONG BAIM**



**NAMBAWAN TRAKTA TRU!**  
**BOROKO MOTORS LTD**  
**MADANG PHONE 2433**

**YU KEN BAIM OL FORD**  
**TRAKTA TU LONG**  
**PORT MORESBY LAE RABAU MT.HAGEN**

KRISTEN PRES i wokim kain kain buk bilong strongim bilip na bilong sanapim gutpela pasin na sindaun na bel isi bilong ol manmeri na ol pikinini.

*Nau yu ken baim 4-pela "Arch Book" long tok Pisin:*

**Pis I Kisim Jona  
 God I Helpim Daniel  
 Haus Antap Long Ston  
 King Em I Singaut**


*4-pela Baibel stori bilong ol pikinini.  
 Ol papamama i laikim ol tu.*

Salim oda i go long:



**KRISTEN PRES**

Sales Division  
 The Christian Book Centre  
 Box 222, Madang



Wanpela soldia i surik i kam daun long wanpela baklain i-hangamap long wanpela helikopta. Sampela poroman bilong em i mekim wankain long soim kain kain pasin bilong woa na pait long ol sumatin bilong 7-pela haikul bilong Is Sepik Distrik i bung long olkain spot long Brandi Haikul long Wewak. Mis Elizabeth Sumbu bilong Ambunti i toktok wantaim soldia Doug Giles.

# PANGU PATI

(Tok i kam long pes 6)

sol yumi no ken lusim planti mani long baim ol sip bilong ol arapela kantri. Yumi yet inap nakim pe.

## 7. OL HAUS:

Pangu Pati bai pait strong moa bilong helpim ol manmeri i wok long gavman long kisim ol gutpela haus, haus inap tru long ol.

Pangu Pati i laik bai gavman i mekim wanpela komisin bilong wokim ol gutpela haus insait long ol taun na long ol ples nabaut. Gavman i mas inapim dispela komisin long mani bai em i ken sanapim planti haus. Na ol haus i no ken tudia. Pe bilong ol i mas daunbilo, inap long ol pipel i ken baim wanpela haus bilong ol yet, sapos ol i laik.

## 8. STRETIM SINDAUN BILONG OL MANMERI LONG PLES.

Pangu Pati i wari planti long painim olkain nupela pasin bilong helpim sindaun bilong ol man i stap long ples. Ol pipel bilong ples i laik winim mani bilong ol yet, i laik mekim go het ples bilong ol. Sapos nogat, ol i les na i ranawe i go kamap long ol taun. Olsem planti ples i stap nating na ol pasin bilong bipo i lus pinis.

Pangu Pati i gat tingting long go skulim ol man stret long ples bilong ol. Skulim ol long ol kain kain pasin bilong wok bisnis na wok didiman - bai ol inap winim mani bilong ol stret.

## 9. WANPELA KANTRI, WANPELA PIPEL:

Pangu Pati em i pati bilong olgeta man bilong Papua New Guinea. Em i no pati bilong wanpela hap tasol. Nogat.

Em i tingting bilong Pangu Pati, ol man bilong dispela kantri

yet i mas bosim kantri bilong ol.

Pangu Pati i laik olgeta manmeri bilong Papua New Guinea i mas kisim planti nupela pasin. Tasol yumi no ken tromoim olgeta pasin bilong bipo. Nogat tru. Sampela pasin bilong ol tumbuna i gutpela tru. Em ol yumi mas holim. Pangu Pati i laik bai yumi olgeta i wanpela pipel, i wanpela kantri tasol. Pangu i laik bai i gat wanpela lo tasol bilong olgeta pipel bilong dispela kantri - maski ol i bilong wanem kain skin, bilong wanem as ples, bilong wanem tok ples.

As tingting bilong mipe-la i olsem:

WANPELA NEM, WANPELA KANTRI, WANPELA PIPEL.

# YUNAITET PATI

(Tok i kam long pes 7)

pipel inap long bihainim.

Yunaitet Pati i bilip ol lo i no bilong helpim ol plisman na jas tasol. Nogat. Ol lo i bilong helpim ol pipel tu.

Yunaitet Pati i ting olsem: dispela kantri em i demokratik. Em i min, tingting bilong ol pipel yet i bosim kantri. Ol i fri, ol inap wokabaut i go long olgeta hap; ol i ken autim ol tingting bilong ol. Wanpela samting tasol ol i mas mekim: ol i mas bihainim lo bilong kantri.

## 6. SOSAL DEVELOPMEN:

Yumi gat planti kain pasin i stap longtaim moa long Papua New Guinea. Tasol i gat planti nupela pasin tu i kamap.

Yunaitet Pati i laik strongim na bihainim sampela pasin bilong ol tumbuna na bungim wantaim sampela nupela pasin.

Pati i strong tu long helpim wok bilong dipatmen bilong sosol wok. Dispela dipatmen i save helpim sindaun bilong ol pipel. Yunaitet Pati

i laikim tumas bai sindaun bilong yumi olgeta i gutpela tru.

## 7. AMI:

Yunaitet Pati i laikim ami na nevi i stap olsem nau. Em i min: Australia yet i ranim tupela. Bi-hain bai yumi ken senisim dispela tingting sapos yumi laik.

## 8. LOKAL GAVMAN:

Yunaitet Pati i laikim ol lokal gavman kaunsil i wok gut wantaim gavman. Ol lokal kaunsil i mas kisim moa pawa long han bilong ol, olsem bai ol yet inap long kamapim sampela lo na bosim sampela wok long hap bilong ol.

## 9. TRANSPOT NA REDIO:

Yunaitet Pati i laikim tumas bai ol pipel long olgeta hap i gat rot bilong ol stret. Olsem tasol ol i ken kamap long maket, winim mani, mekim wok bisnis. Olsem tu gavman inap kamap lukautim gut sindaun bilong ol.

Yumi mas gat moa rot, moa ples balus, moa bris bilong ol sip i ken kamap.

Pati i laik bai gavman i strongim ol redio stesin bilong nau, na i mas kirapim sampela nupela. Olsem bai olgeta manmeri long dispela kantri inap harim nius long tok ples bilong ol stret na long tok Inglis na Pisin na Motu.

Yunaitet Pati i laikim wok bilong haus pos i go het moa moa yet, olsem bai ol pas i ken kamap long olgeta hap tru.

## 10. SINGAUTIM KAMPANI:

Em i min olsem: yumi mas pulim na singautim ol kampani bilong arapela kantri i kam insait long Papua New Guinea na kirapim planti nupela wok. Ol bai i putim mani bilong ol insait long ol nupela wok na i kirapim olkain bisnis na faktori hia. Olsem tasol planti man bilong yumi i ken painim gutpela wok na kisim nupela save. Na tu

Papua New Guinea i ken painim planti mani moa na helpim sindaun bilong olgeta pipel insait long en. Olsem tu kantri inap kamap strong.

## 11. KRISTEN NESENAL

### YUNITI

Em i min Yunaitet Pati i amamas tru long gutpela wok bilong olkain Kristen misin insait long Papua New Guinea. Ol i bin givim gutpela ting long olgeta manmeri na i bin helpim sindaun bilong ol. Pati i laik olgeta misin ol i mas wok gut wantaim na pasim ol manmeri bilong dispela kantri long wanpela pipel tasol.

Yunaitet Pati i no laik gavman i pasim wok bilong ol misin.

Dispela toksave olgeta memba bilong Yunaitet Pati insait long Haus Asembli i orait long en long Trinde, namba 29 de bilong Septemba 1971.

Em hia nem bilong ol 6-pela man i bin raitim dispela as tingting bilong Yunaitet Pati: Mista Tei Abal - Siaman bilong Pati (Wabag Open) Mista Sabumei Kofikai (Goroka Open) Mista Yakob Talis (Wape-Nuku Open). Mista Meck Singilong (Finschhafen Open). Mista Andagari Wabiria (Koroba Open). Mista Tore Lokoloko (Kerema Open).



Wantok Publications  
P.O. Box 298, Wewak, i  
wokim, na Wirui Pres  
long Wewak i prinim.

